

Inatsisartut suleriaasianni § 37, imm. 1 naapertorlugu, Naalackersuisunut apeqqutit imaattut matumuuna saqqummiuppakka:

- 1. Nuummi umiarsualiviup allilerneqarnissaanut tunngatillugu maannamut aalajangersimanermit toqqammavinnut sunniuteqartunik paasissutissanik nutaanik takkuttoqarsimava?**
- 2. Nuummi umiarsualivimmi naammassisinnaasatigut ajornartorsiuteqarnerup aaqqiiviginissaanut kiisalu nunarput tamakkerlugu illoqarfinnut nunaqarfinnullu nioqqutissanik pilersuineq qulakkeerniarlugu Naalackersuisut sunik eqqarsaatersuuteqarpat?**

(Inatsisartunut ilaasortaq Per Berthelsen, Siumut)

Tunngavilersuut:

Nuuk nunatsinni illoqarfiit pingaarnersaattut kiisalu aningaasarsiornermi qitiusumik inisisimanermigut nunatsinni ataatsimoortumik siuariartornissamut ineriartornissamullu siuttuusussatut immikkut pisussaaffeqartutut inissisimavoq, Nuummilu umiarsualivimmik allilerineq tamatumunnga qulakkeerinninnissamut suliniutissanut ilaavoq.

Nuummi umiarsualivimmik allilerinissap sanaartugassanik nutaanik ataatsimoortumik tulleriiaarinissamut ilaanissaa kiisalu piginnittuunermut aningaasalersuinermullu tunngasut misissoqqinneqassasut Peqqissutsimut Attaveqaqatigiinnermullu Naalackersuisup Steen Lyngep oqaatigaa. Taamatut oqariartuuteqarneq tulleriiaarinermik kiisalu umiarsualiviup kinguartinneqarnissaanik nipeqarpoq, tamannalu inuiaqatigiinnut annertuumik kinguneqaateqassaaq.

Ukiorpasuit ingerlaneranni misissuinernik sukumiisunik Nuummi umiarsualiviup allilerneqarnissaata pisariaqassusianik sukumiisumik takutitsisunik suliaqartoqartarpoq. Piginnittuunermut aningaasalersuinissamullu pissutsit misissorluarneqareerput, taamaalillunilumi aalajangernissamut toqqammavissat naammattut pigineqareerput.

Apeqqutima ullut qulit iluanni akineqareersimanissaa kissaatigaara.